

职方外纪·卷二

欧 逻 巴 总 说

天下第二大州，名曰欧逻巴。其地南起地中海北极出地三十五度，北至冰海出地八十余度，南北相距四十五度，径一万一千二百五十里，西起西海福岛初度，东至阿比河九十二度，径二万三千里。共七十余国，其大者曰以西把尼亚，曰拂郎察，曰意大里亚，曰亚勒马尼亚，曰法兰得斯，曰波罗尼亚，曰翁加里亚，曰大尼亚，曰云除亚，曰诺勿惹亚，曰厄勒祭亚，曰莫斯科未亚。其地中海，则有甘的亚诸岛；西海，则有意而兰、大谏、厄利亚诸岛云。

凡欧罗巴州内大小诸国，自国王以及庶民，皆奉天主耶稣正教。纤毫异学，不容窜入。国主互为婚姻，世相和好，财用百物，有无相通，不私封殖。其婚娶，男子大约三十，女子至二十外，临时议婚，不预聘。通国之中，皆一夫一妇，无敢有二色者。土多肥饶，产五谷，米麦为重，果实更繁。出五金，以金、银、铜、铁钱为币。衣服，蚕丝者有天鹅

皆奉天主
耶稣教

绒、织金段之属；羊绒者，有毡罽、锁哈刺之属；又有些麻之类，名利诺者，为布绝细而坚，轻而滑，敝则可捣为纸，极坚韧，今西洋纸率此物。君臣冠服，各有差等。相见以免冠为礼。男子二十已上，概衣青色，兵士勿论。女人以金宝为饰服，御罗绮，佩带诸香。至四十及未四十而寡者，即屏去，衣素衣。

酒悉以葡萄酿成，不杂他物。其酒积至数十年，当生子之年酿酒，至儿年三十娶妇时用之，酒味愈美，诸种不同。无葡萄处，或用牟麦酿之。其膏油之类，味美而用多

阿利袜油
最饶风味

者，曰阿利袜，是树头之果，熟后即全为油。其生最繁，又易长，平地山冈，皆可栽种。国人以法制之，最饶风味，食之齿颊生津，在橄榄、马金囊之上。其核又可为炭，滓可为硷，叶可食牛羊，凡国人所称资产。蓄大小麦第一，葡萄酒次之，阿利袜油又次之，蓄牛羊者为下。其国俗虽多酒，但会客不以劝饮为礼。偶犯醉者，终身以为诟辱。饮食用金银、玻璃及磁器。

天下万国，坐皆席地，惟中国及欧罗巴诸国，知用椅桌。其屋有三等，最上者纯以石砌；其次砖为墙柱，木为栋梁；其下土为墙，木为梁柱。石屋砖屋，筑基最深，可上累六七层，高至十余丈；地中亦有一层，既可窖藏，亦可除湿。瓦或用铅，或轻石板，或陶瓦。凡砖石屋，皆历千年不坏。墙厚而实，外气难通，冬不寒而夏不溽。其工作，如木工、石工、画工、塑工、绣工之类，皆颇知度

数之学，制造备极精巧。凡为国工者，皆考选用之。其驾车，国王用八马，大臣六马，其次四马或二马。乘载，骡、马、驴互用。战马皆用牡，骗过则弱不堪战矣。又良马止饲大麦及秆，不杂他草及豆，食豆者足重不可行。此欧逻巴饮食、衣服、宫室制度之大略也。

欧逻巴诸国皆尚文学。国王广设学校，一国、一郡有大学、中学，一乡、一邑有小学。小学选学行之士为师，中学、大学又选学行最优之士为师，生徒多者至数万人。其小学曰文科，有四种：一古贤名训；一各国史书；一各种诗文；一文章议论。学者自七八岁学至十七八。学成，而本学之师儒试之。优者进于中学，曰理科，有三家：初年学“落日加”，译言辨是非之法；二年学“费西加”，译言察性理之道；三年学“默达费西加”，译言察性理以上之学，总名“斐录所费亚”。学成，而本学师儒又试之，优者进于大学。乃分为四科，而听人自择：一曰医科，主疗病疾；一曰治科，主习政事；一曰教科，主守教法；一曰道科，主兴教化。皆学数年，而后成学。成，而师儒又严考阅之。

大中小学
之课程

凡试士之法，师儒群集于上，生徒北面于下。一师问难毕，又轮一师，果能对答如流，然后取中。其试，一日止一二人，一人遍应诸师之问。如是取中，便许任事。学道者专务化民，不与国事。治民者秩满后，国王遣官察其政绩，

考试用
人之法

详访于民间，凡所为听理词讼、劝课农桑、兴革利弊、育养人民之类，皆审其功罪之实，以告于王，而黜陟之。凡四科官，禄入皆厚，养廉有余，尚能推惠贫乏，绝无交贿行赂等情。其诸国所读书籍，皆圣贤撰著，从古相传，而一以天主经典为宗。即后贤有作，亦必合于大道，有益人心，乃许流传国内。亦专设校书官，看详群书，经详定

官设书院
听人抄读

讫，方准书肆刊行。故书院积书至数十万卷，毋容一字蛊惑人心、败坏风俗者。其都会大地，皆有官设书院，聚书于中，日开门二次，听士子入内抄写诵读，但不许携出也。

又四科大学之外，有度数之学，曰“玛得玛第加”，亦属斐录所科内。此专究物形之度与数。度其完者，以为几何大；数其截者，以为几何多。二者或脱物而空论之：则数者，立算法家；度者，立量法家。或体物而偕论之：则数者在音，相济为和，立律吕家；度者在天，迭运为时，立历法家。此学亦设学立师，但不以取土耳。此欧逻巴建学设官之大略也。

欧逻巴国人奉天主正教，在遵持两端：其一爱敬天主，万物之上；其一爱人如己。爱敬天主者，心坚信、望、仁三德，而身则勤行瞻礼工夫。其瞻礼殿堂，自国都以至乡井，随在建立。复有掌教者，专主教事，人皆称为神父，俱守童身、屏俗缘，纯全一心，敬事天主，化诱世人。其殿堂一切供亿，皆国王大臣民庶转输不绝，国人群众往归焉。每七日，则行公共瞻礼，名曰弥撒。此日百工悉罢，

通国上下往焉。听掌教者讲论经典，劝善戒恶。女妇则另居一处而听，男女有别。

其爱人如己，一是爱其灵魂，使之为善去恶，尽享生天之福。二是爱其形躯，如我不慈人，天主亦不慈我。故欧逻巴人，俱喜施舍，千余年来，未有因贫鬻子女者，未有饥饿转沟壑者。在处皆有贫院，专养一方鳏寡孤独。处其中者，又各有业，虽残疾之人亦不废。如瞽者运手足，痹者运耳目，各有攸当，务使曲尽其才，而不为天壤之废物。

又有幼院，专育小儿。为贫者生儿，举之无力，杀之有罪，故特设此院，令人抚育，以全儿命。其族贵而家贫者，耻于

幼院专育
贫家小儿

送子入院，更有两全之法。其院穴墙以设转盘，内外隔绝不相见。送儿者乘人不见，置儿盘中，扣墙，则院中人转儿入矣。其曾领洗与否，皆明记儿胸。异时父母复欲收养，则按所入之年月，便得其子。

又有病院，大城多至数十所。有中下院，处中下人；有大人院，处贵人。凡贵人，若羁旅，若使客，偶值患病，则入此院。院倍美于常屋，所需药物，悉有主者掌之，预备名医，日与病者诊视。复有衣衾帷幔之属，调护看守之人，病愈而去，贫者量给资斧。此乃国王、大家所立，或城中人并力而成，月轮一大贵人总领其事。凡药物饮食，皆亲自验视之。

各城邑遇丰年，多积米麦，饥岁以常价粜之，如所谓

其他仁
爱之事

常平仓者。人遇道中遗物，或兽畜之类，必觅其主还之，弗得主则养之。国中每年数日定一公所，认识遗畜，失者与得者偕来会集。如遇原主，则听其领去。如终不得主，则或宰肉，或卖价，以散贫人。若拾金银宝物，则书于天主堂门外，令人来识。先令预言其状，如一一符合，即以还之，不得主亦散于贫乏。国中又有天理堂，选盛德宏才、无求于世者主之。凡国家有大举动、大征伐，必先质之此堂，问合天理与否。拟以为可，然后行之。国人病危，悔过祈赦，则分析产业，遗一分为仁用，或以救贫乏，或以助病院，或以赎敌国所虏，或以修饰天主殿廷。一切仁事，悉从病人之意。遗于子孙，为子孙之财。遗于仁用，谓己灵魂之财。

守童贞修
行之人

其圣教中人，更有慕道最深，抛弃世间福乐，或避居于山谷，或入圣人圣女所立之会，而毕世修持者。其入会，须发三誓：一守贞以绝色；一安贫以绝财；一从命以绝意。凡欧逻巴诸国，从十六七岁愿入会中矢志守童身者，自国王大臣宗室以下男女不可胜纪。其女子入会后，惟父母至戚得往见之，余绝不相交接。其会中居室，原极宏敞，亦自不碍游息也。其男子入会，例有多端：有专自修，不务化人者；有务化人，不能远游者；又有化人，而欲及天下者。此则离本国，捐朋友，弃亲戚，遍历遐方。其视天下犹一家，视天下人犹一体，不辞险阻艰辛，虽啖人炙人之地亦身历

焉，惟祈普天之下，皆识真主，而救其灵魂升天，以毕素志。此欧逻巴敬天爱人之大略也。

欧逻巴诸国，赋税不过十分之一。民皆自输，无征比催科之法。词讼极简，小事里中有德者自与和解，大事乃闻官府。

词讼刑法

官府听断，不以己意裁决。所凭法律条例，皆从前格物穷理之王所立，至详至当。官府必设三堂。词讼大者，先诉第三堂；不服，告之第二堂；又不服，告之第一堂；终不服，则上之国堂。经此堂判后，人无不听于理矣。讼狱皆据实，诬告则告者与证见即以所告之罪坐之。若告者与诉者指言证见是仇，或生平无行，或尝经酒醉，即不听为证者。凡官府判事，除实犯真赃外，亦不先事加刑；必俟事明罪定，招认允服，然后刑之。官亦始终不加骂詈，即辞色略有偏向，讼者亦得执言不服，改就他官听断焉。吏胥饷廩，虽亦出于词讼，但因事大小以为多寡，立有定例，刊布署前，不能多取。故官府无恃势剥夺，吏胥无舞文诈害。此欧逻巴刑政之大略也。

封内虽无战斗，其有邪教异国，恃强侵侮，不可德驯，如鞑而鞑、度尔格等者，本国除常设兵政外，又有世族英贤、智勇兼备者，尝以数千人结为义会，大抵一可当十，皆以保国护民为志。其初入会者，试，果不惮诸艰，方始听入焉。会在地中海马儿达岛，长者主之。遇警则鸠集成师，而必灭寇成功。他国亦有别会，俱仿佛乎此，即国王亦有与其共会者。此又欧逻巴武备之大略也。

以西把尼亚

西班牙

欧逻巴之极西，曰以西把尼亚。南起三十五度，北至四十度，东起六度，西至十八度，周一万二千五百里，疆域遍跨他国。世称天下万国，相连一处者，中国为冠；若分散于他域者，以西把尼亚为冠。以西把尼亚本地三面环海，一面临山，山曰北勒摘何。产骏马、五金、丝绵、细绒、白糖之属。

国人极好学，有共学在撒辣蔓加与亚而加辣二所，远近学者聚焉。高人辈出，著作甚富，而陟禄日亚与天文之学尤精。古一名贤，曰多斯达笃者，居俾斯玻之位，著书最多，寿仅五旬有二。所著书籍，就始生至卒计之，每一日当得三十六章，每章二千余言，尽属奥理。后人绘彼象，两手各持一笔，章其勤敏也。又有一王名亚丰肃者，好天文历法，精研诸天之运，列宿之躔，撰成《历学全书》。世传岁差，本原皆其考定，制为一定图象，为今历家大用。又将国典分门定类，为七大部，法纪极备。复取天主古今经籍，有注疏者不下千余卷，遍阅至十有四次。又纂本国自古史书。夫既身亲国政，又傍及著述种种如此，后世称曰贤者之王，宜矣。

国王好学

此国人自古虔奉天主圣教，最忍耐，又刚果，且善远

游海上，曾有绕大地一周者。国中有二大名城，一曰西未利亚，近地中海，为亚墨利加诸舶所聚，金银如土，奇物无数，又多阿利禄果，有一林长五百里者。一名多勒多，城在山之巅，取山下之水以供山上。其运水甚艰，近百年内，有巧者制一水器，能盘水直至山城，而绝不赖人力，其器昼夜自能转动也。又有浑天象，其大如屋，人可以身入其中，见各重天之运动，其度数皆与天合。相传制此象者，注想十七年，造作三年，曾未重作一轮。

其境内有河，曰寡第亚纳，伏流地中百余里，穹窿若桥梁，其上为牧场，畜牛羊无算。有塞恶未亚城，乏甘泉，遥从远山递至。驾一石梁，梁上作水道，擎以石柱，绵亘数十里。又一都城，悉皆火石砌成。故本国有言：以西把尼亚有三奇，有一桥万羊牧其上，有一桥水流其上，有一城以火为城池也。

国有三奇

国中奉天主之堂虽多，而最著者有三：一以奉歌雅默圣人，为十二宗徒之一，首传圣教于此国，国人尊为大师大保主，四方万国之人，多至此瞻礼。一在多勒多城，创建极美，中有金宝祭器不下数千。有一精巧银殿，高丈余，阔丈许。内有一小金殿，高数尺，其工费又皆多于本殿金银之数。其黄金乃国人初通海外亚墨利加所携来者，贡之于王，王用以供天主耶稣者。近来国主又造一瞻礼大堂，高大奇巧无比，修道之士环居焉。其内可容三国之王，水泉四十余处。堂前有古王像六位，每位高一丈八尺，乃黑白

玉琢成者。堂内有三十六祭台。中台左右有编箫二座，中各有三十二层，每层百管，管各一音，合三千余管。凡风雨、波涛、呕吟、战斗，与夫百鸟之声，皆可模仿，真奇物也。又有书堂，阔三十步，长一百八十五步，周列诸国经典书籍，种种皆备。即海外额勒济亚国之古书，亦以海舶载来，贮于此处。其地原系旷野山林，后因造此堂，鸠工住集，七年遂成一城云。

编箫有三
十余音管

以西把尼亚属国大者二十余，中下共百余。其在最西者曰波尔杜瓦尔，分为五道。向有本王，后因乏嗣，以西把尼亚之君系其昆仲，乃权署其国事焉。其境内大河曰得若，经都城里西波亚入海。故四方商船，皆聚都城，为欧逻巴总会之地也。土产果实、丝绵极美，水族亦繁。所出土产葡萄酒最佳，即过海至中国，毫不损坏。国中共学二所：曰厄勿辣，曰哥应拔。其讲学名贤，曾经国王所聘，虽已辍讲，亦终身给禄不绝。欧逻巴高士，多出此学。近有耶稣会士苏氏，著陡禄日亚书最精最广，超数百年名贤之上，其德更迈于文。国都又有一地，界两河间，周围仅七百里，而高士聚会修道之所，有一百三十处。又有天主堂一千四百八十所，水泉二万五千，大方石桥二百，通海大市六处，由此可见其地之丰厚也。

波尔杜
瓦尔

侯家苑囿，有周数十里者，各种禽兽，充牣其中。异国名王，过其地者，往射猎焉。随处立有仁会，遍恤孤寡

莪独，或给衣食，或助资贿，或保护其家，或葬死者。商舶至，或有死而无主者，则为收其行李，访其亲戚还之。种种仁事，他国虽各有会，莫如此中之盛。此外国王随处遣官，专抚恤孤子，理其家产，广其生殖，长则还所有，且增益焉。欧逻巴初通海道，周经利未亚，过大浪山，抵小西洋，而至中国贸迁者，从此国始，详见别纪。

拂郎察

以西把尼亚东北为拂郎察，南起四十一度，北至五十度，西起十五度，东至三十一度，周一万一千二百里，地分十六道，属国五十余。其都城名把理斯，设一共学，生徒常四万余人，并他方学，共有七所。又设社院，以教贫士，一切供亿，皆王主之。每士计费百金，院居数十人，共五十五处。中古有一圣王名类斯者，恶回回占据如德亚地，初兴兵伐之，始制大铤。因其国在欧逻巴内，回回遂概称西土人为“拂郎机”，而铤亦沿袭此名。

法兰西

是国之王，天主特赐宠异。自古迄今之主，皆赐一神，能以手抚人病疮，应手而愈。至今其王每岁一日疗人，先期斋戒三日，凡患此疾者，远在万里之外，预毕集天主殿中。国王举手抚之，祝曰：“王者抚汝，天主赦汝。”抚百人，百人愈；抚千人，千人愈。其神异如此。

国王治病之神话

国王元子，别有土地供其禄食，不异一小王，他国不尔也。国土极膏腴，物力丰富，居民安逸。有山出石，蓝色，质脆，可锯为板，当瓦覆屋。国人性情温爽，礼貌周全，尚文好学。都中梓行书籍繁盛，甚有声闻。又奉教甚笃，所建瞻礼天主与讲道殿堂，大小不下十万。初传教于此国者，原系如德亚国圣人辣杂碌。乃当时已死四日，蒙耶稣恩造，命之复活，即此人也。

意 大 理 亚

拂郎察东南为意大里亚，南北度数自三十八至四十六，东西度数自二十九至四十三，周围一万五千里。三面环地中海，一面临高山，名牙而白。又有亚伯尼诺山，横界于中。地产丰厚，物力十全。四远之人，辐辏于此。旧有一千一百六十六郡，其最大者曰罗马，古为总王之都，欧逻巴诸国皆臣服焉。城周一百五十里，地有大渠，名曰地白里，穿出城外百里，以入于海。四方商舶，悉输珍宝，骈集此渠。自古名贤，多出此地。曾建一大殿，圆形，宽大壮丽无比。上为圆顶，悉用砖石，砖石之上，复加铅板。当瓦顶之正中，凿空二丈余，以透天光，显其巧妙，供奉诸神于内。此殿至今二千余年尚在也。

意大利为
教皇之都

耶稣升天之后。圣徒分走四方布教。中有二位，一伯多禄，一宝碌，皆至罗马都城讲论天主事理，人多信从。

此二圣之后，又累有盛德之士，相继阐明。至于总王公斯珣丁者，钦奉特虔，尽改前奉邪神之宇，为瞻礼诸圣人之殿，而更立他殿以奉天主，至今存焉。教皇即居于此，以代天主在世主教。自伯多禄至今一千六百余年，相继不绝。教皇皆不婚娶，永无世及之事，但凭盛德，辅弼大臣公推其一而立焉。欧逻巴历国之王，虽非其臣，然咸致敬尽礼，称为圣父、神师，认为代天主教之君也。凡有大事莫决，必请命焉。其左右尝简列国才全德备，或即王侯至戚五六十人，分领教事。

此罗马城奇观甚多，聊举数事。宰辅之家，有一名苑，中造流觞曲水，机巧异常。多有铜铸各类禽鸟，遇机一发，自能鼓翼而鸣，各有本类之声。西乐编箫最有巧音，然亦多假人工风力成音。此苑中有一编箫，但置水中，机动则鸣，其音甚妙。此外又有高大浑金石柱，外周尽镂古今王者形象故事，烂然可观。其内则空虚，可容几人登跻上下，如一塔然。伯多禄圣人之殿，悉用精石制造，花素奇巧，宽大可容五六万人。殿高处视在下之人，如孩童然。城中有七山，其大者曰玛山，人烟最稠密，第苦无泉。迺来造一高梁，长六十里，梁上立沟，接其远山之水，如通流河也。有水泉，饮之其味与乳无异，汲之不竭，蓄之不溢。近地曰罗肋多，一圣殿即昔日圣母玛利亚亲身所居之室。此室旧在如德亚国，后为回回窃据，天神凌空移至此地，越海七千余里。国人欲致崇饰，恐失其旧，因周以玉墙，

罗马城
之奇观

覆以大殿。今逢圣母诞日，行旅来朝者，常至数万人。儒略尝亲诣此殿，今已屹然巨镇矣。

城建海中
水为街道

其西北为勿搦祭亚，无国王，世家共推一有功德者为主。城建海中，有一种木为桩，入水千万年不腐。其上铺石造屋，复以砖石为之，备极精美。城内街衢俱是海，两傍可通陆行。城中有艘二万。又有一桥梁极阔，上列三街，俱有民居间隔，了不异城市，其高又可下度风帆。国中精于造舟，预庀物料，一舟指顾可成。他方重客，每至其处阅视，一两时，其工已成一巨舫，可以航海者矣。所造玻璃极佳，甲于天下。有勿里诺湖在山巅，从石峡泻下，声如迅雷，闻五十里。飞泉喷沫成珠，日光耀之，恍惚皆虹霓状。有一异泉，出山石中。不拘何物，坠于其内，半月便生石皮，周裹其物。又有沸泉，有温泉。沸泉尝沸高丈余，不可染指，投畜物于内，顷刻便可糜烂矣。温泉女子或浴或饮，不生育者育，能育者多乳。所产铁矿，掘尽，逾二十五年复生。第在本土，任加火力，铁终不熔，之他所始熔。

其南为纳波里，地极丰厚，君长极多。有火山昼夜出火，爆石弹射他方，恒至百里外。昔一名士欲穷其故，近其山，为火燎死。后移一圣人遗蜕至本国，其害遂息。有一城名亚既诺，圣人多玛斯著陡录日亚者生于此地。又地名哥生济亚，有两河，一河濯发则黄，濯丝则白，一河濯丝发俱黑。其外有博乐业城，因多公学，名为学问之母。昔

有二大家，争为奇事。一家造一方塔，高出云表，以为无复可逾。一家亦建一塔，与前塔齐；第彼塔直耸，此则斜倚若倾，而今已历数百年未坏，直耸者反将颓矣。又有城名把都亚，中有公堂，纵二百步，横六十步，上为楼，覆以铅瓦，而中间不立一柱。又把儿玛一堂，广可驰马，亦无一柱，惟以梁如人字相倚，寻丈至盈尺皆然；上压愈重，则下挺持愈坚也。从纳波里至左里城，有石山相间隔，国人穴山以通道，长可四五里，广可容两车，对视则如明星。又有地出火，四周皆小山，山洞甚多，入内皆可疗病。又各主一疾，如欲得汗者，入某洞则汗至；欲除湿者，入某洞则湿去。因有百洞，遂名曰一百所。此皆意大里亚属国也。其大者六国，俱极富庶。西谚尝曰：罗马为圣，勿搦祭亚为富，弥郎为大，那坡里为华，热拿亚为高，樞楞察为整：各有专书备论。

斜塔

意大里亚之名岛有三。一西齐里亚，地极丰厚，俗称国之仓之库之魂，皆美其富庶也。亦有名山，喷火不绝。百年前其火特异，火烬直飞逾海，达利未亚境。山四周多草木，积雪不消，常成晶石。亦有沸泉如醋，物入便黑。其国人最慧，善谈论，西土称为三舌人。最精天文，造日晷法自此地始。有巧工德大禄者，造百鸟自能飞，即微如蝇虫亦能飞。更有天文师名亚而儿墨得者，有三绝：尝有敌国驾数百艘临其岛，国人计无所出，已则铸一巨镜，映日注射敌

西齐里亚
人最慧

艘，光照火发，数百艘一时烧尽。又其王命造一航海极大之舶，舶成将下之海，计虽倾一国之力，用牛马骆驼千万，莫能运舟；几墨得营运巧法，第令王一举手，舟如山岳转动，须臾下海矣。又造一自动浑天仪，十二重层层相间，七政各有本动，凡日月五星列宿运行之迟疾，一一与天无二；其仪以玻璃为之，重重可透视，真希世珍也。其傍近有马儿岛，不生毒物，即蛇蝎等亦不螫人。毒物自外至，至岛辄死。

一、掇而地泥亚，亦广大。生一草，各掇而多泥，人食之辄笑死。状虽如笑，中实楚也。西谚凡谓无情之笑，皆名掇而多泥笑。

一、哥而西加，有三十三城。所产犬能战，一犬可当一骑。故其国布阵，一骑间一犬，反有骑不如犬者。又近热奴亚一鸡岛，满岛皆鸡，自生自育，不须人养，又绝非野雉之属。

亚勒玛尼亚

日耳曼诸
侯选国王

拂郎察之东北，有国曰亚勒玛尼亚。南四十五度半，北五十五度半，西二十三，东四十六度。国王不世及，乃其七大属国之君所共推者；或用本国之臣，或用列国之君，须请命教皇立之。中国设共学十九所。其气候冬月极冷，善造暖室，微火温之，遂极暖。土人散处各国，以为兵，极忠实可用，

至死不二。各国护卫宫城，或从征他国，亲兵皆选此国人充之，本国人仅参其半。其工作极精巧，制器匪夷所思，能于戒指内纳一自鸣钟。地多水泽，冰坚后人多于冰上用一种木屐，两足蹶之，一足立冰上，一足从后激之，乘滑势一激数丈，其行甚速，手中尚不废常业也。又有法兰哥地，人最质直，易信。行旅过者，辄置之。客或不答，则大喜，延入具酒食，或为计缓急。未室者则妻之，谓此人已经尝试，可信托也。多葡萄，善造酒，但沽与他方过客，土人滴酒不入口，惟饮水而已。即他国载酒至，亦不容入境。其属国名博厄美亚者，地生金，掘井恒得金块，有重十余斤者，河底常有金如豆粒。有罗得林日亚国者，最侈汰。西土宫室，多用帷幔障壁。其王有一延客堂，四周皆列珊瑚，琅玕交错，俨一屏障。又有一大铙，制作极巧，二刻之间，可连发四十次。

法 兰 得 斯

亚勒马尼亚之西南，为法兰得斯。地不甚广，人居稠密。有大城二百八十，小城六千三百六十八。共学三所，一学分二十余院。人情俱乐易温良，最好谈论，善讴歌。其妇女与人贸易，无异男人，顾其性极贞洁。能手作错金绒，不烦机杼。西洋布最轻细者，皆出此地。

荷兰妇女
无异男人